

Pauro Piripos ezektsa bo ziwatahaka

Pauro Piripos ezektsa bo Sesus soho nitsasoko iwaze wastuhu Sesus humo sispirikporētsa niyziknaha. Bykyze sakyriukanikitsa hurukwy eze niapykyrykze sibo ziwatahaka. Deus hyrikoso Pauro tuk niapykyryk iwatahi Deus harere ziwatahaka iwatsahi katsa kino niwatihi Sesus soho humo tanymyryky.

¹ Uta Pauro Timoteo niwatihi ahatsa katsaktsa Sesus Kiristu tsumuēhītsa tsimaha. Timoteo katuk my. Uta Sesus Kiristu tsumuēhītsa ahabo piwatahaka. Ikiahatsa Sesus tuktsa Piripos ezektsa ahabo piwatahaka. Sesus tuktsa sispirikpokotsa sitsumuēhītsitsa kino niwatihi sizubarētsa bo piwatahaka.

² Deus myzo bo mopamykysoko. Sesus Kiristu kino niwatihi iharere bo hyỹ tsimykaranaha. Sibō hi mopamykysoko. Uta hi ispe my:

— O Deus myzo Piripos ezektsa Sesus tuktsa tysipokzitsikta! Ikia humo sakurētsa moziknaha ba paikpa mytsaty zikaha — my. Iwa ahatsyhyryze mykara.

Pauro Piripos ezektsa tsyhyryze Deus bo ni-pamykysoko.

³ Ahasoho humo mytsaty mykaraze Deus bo mosakibaziki:

— O Deus ikia zuba tsamysapyrēta — mykara.

⁴ Deus bo ahatsyhyryze mopamykysokoze kakurēta. Ahazubarētsa tsyhyryze Deus

bo mopamykysokoze kakurēta hỹ. ⁵ Hawa tapara tsiktsumuēhĩkĩnaha bo mytsaty mykara. Deus harere ahabo iktsasokoze ikziakbata zuba iharere bo hyỹ tsimykaranaha nawaze tsiktsumuēhĩkĩnaha iwatahi kakurēta hỹ.

⁶ Ikiahatsa meky watu tsimoziknaha. Deus humo ahamysapyrētsa tsimoziknaha. Iwa ahatuk mykara hawa mozihikik Deus zikwy humo yhỹ tsimykaranaha. Aibani zuba Sesus Kiristu myzik-sizoze hawa Deus mozihikikze mopykba.

⁷ Ikiahatsa soho mytsaty mynakaraze ana humo hi kakurēta. Ahahumo kamypokzitsiarēta. Kytsa sakyriukrēnikitsa hurukwy bo zikoktyhyryknahaze, ziktsumuēhĩnaha katuktsa tsikyziknaha hỹ. Abaka sakyriukrēnikitsa hurukwy eze tsiktsumuēhĩkĩnaha. Iknakuruze Deus wasania ty ziwatawyky. Iharere zibetesaka ana humo hi kytsa iharere bo hyỹ nikaranaha sispirikporētsa niyziknaha. Ikiahatsa kino niwatihi tsiktsumuēhĩkĩnaha. Iwatahi ahahumo kamypokzitsiarēta iwa wasani my hỹ. ⁸ Sesus Kiristu kahumo tsimypokzitsiarēta hỹ. Iwatahi utakta iwata my ahahumo kamypokzitsiarēta:

— Wasape my. Iwa Deus okzeka motsasoko ahahumo kamypokzitsiarēta hỹ. Ikiahatsa humo ka kahyrizikbarēta iwa Deus zikyrinymyryky — my.

⁹ Deus bo ahatsyhyryze ipe my:

— O myzo Sesus tuktsa Piripos ezektsa ahumo simypokzitsirētsa. Ikia humo hi myharape pokz-itsikinaha. Asoho pinymyrytohinaha! Ba ziksimyiwu hawa myhyrinymyrywy baba humo sihyrinymyrētsa iwa tysitsumuēhĩkĩkta — my.

Iwa Deus bo ahatsyhyryze mopamykyso.
¹⁰ O Piripos ezektsa hawa tsimykana naha humo ahahyrinymyrētsa hawa wasani haty ahahyrinymyrētsa. Ba zikmyinaha. Nawa tsimyzurukunaha zeka Sesus myziksizoze batu ahasikpyby. Ahamysapyrētsa tsimoziknaha iwaze batu ahasikpyby. ¹¹ Iwa tsimyzurukunaha zeka wasania ty zuba tsimykanaha. Hawa wasani tsimykanaha. Iwaze kytsa sizubarētsa ahahumo hi Deus bo motsasokonaha:

— O Deus ikia zuba tsamysapyrēta. Ikia zuba wasani tsimykana — maha. Iwa ahahumo Deus bo mosakibazikiknaha.

Kabo ka Kiristu zuba mozihihik.

¹² O katukytsa hawa kytsa piksukyrykiknaha Sesus harere iktsasokoze, kytsa sizubarētsa humo wasani niyziknaha. Abaka kytsa sizubarētsa Sesus harere bo hyỹ mykanaha iwatsahi ihumo sispirikporētsa moziknaha. Sinini ikykaraze Sesus harere bo hyỹ mykanaha iwatahi kakurēta. ¹³ Ana kino sodadutsa pikperykynaha. Kytsa sizubarētsa kino niwatihi kasoho botu ziwabynaha. Uta kino sakyriukanikitsa hurukwy eze tu Sesus harere motsasoko ana hi ziwabynaha.

¹⁴ Iwaze katukytsa kabo iktsa mykanahaze sakyriukanikitsa hurukwy eze tu sipunihikrētsa moziknaha. Deus hi nisiakuwyky iwatsahi Sesus harere bo hyỹ mykanaha ihumo sispirikporētsa. Sipunihikrētsa tu nanabyitaba Sesus harere motsasokonaha. Sipybybyitsa mykanaha Sesus harere motsasokonaha batu pyk zikaha.

¹⁵ Wastuhu zuba kytsa niharapepehakanahatsa humo Sesus soho motsasokonaha. Kahumo sizokdirētsa iwatsahi Deus wasania ty Sesus soho motsasokonaha. Utsaktsa batu. Asahi simyzi-hikrētsa Deus harere siakparawy iwatsahi Deus wasania ty motsasokonaha. ¹⁶ Asahi kahumo simypokzitsirētsa iwatsahi Deus wasania ty motsasokonaha. Tubabatu Deus kape niy:

— Ahyriziktsokzawy humo wasania tytsaso. Myzubaha bokta! Kaharere wasania ty sibo tsiwatawykta! — niy. Iwatsahi asaktsa simyzi-hikrētsa katsyhyryze Deus wasania ty motsasokonaha. ¹⁷ Utsaktsa batu. Sizokdirētsa tu Sesus soho motsasokonaha, taha bo zuba mynakaranaha. Batu wasani zikaha. Asahi:

— Katsaktsa Sesus soho motsasokonaha zeka katsa Pauro watsa tsimoziknaha. Iwaze kytsa mysoho “O asahi sihyrinymyrētsa maha” mytsaty ahabyitsa zikaha. O Pauro sakyriukanikitsa hurukwy eze mysoho ziwabyze iaku byita niyzik mytsaty ahabyitsa mykaranaha — nikaranaha.

¹⁸ Wasaniha ty Sesus soho motsasonahaze anahumo hi kakurēta. Kytsa taha bo zuba mytsaty mykaranaha zeka Sesus soho motsasonahaze. Kytsa kino niwatihi simyzi-hikrētsa mykaranaha zeka Sesus soho motsasonaha iwatahi kakurēta mykara. Wasaniha ty Sesus soho motsasonahaze ana humo hi kakurēta mykara. ¹⁹ Iwatatu sakyriukrēnikitsa hurukwy eze tu kakurēta. Hawataeze piksukenaha ana humo hi kahyrinymyrēta. Ikiahatsa katsyhyryze Deus bo tsimypamykysokonaha atahi pahawaby iwaze piksukenaha. Sesus Kiristu hyrikoso

piktsumuēhī iwatahi piksukenaha anahumo hi kahyrinymyrēta.

²⁰ Kiristu tuk zuba mynakara ana hi mozihikik. Kamysapyrēta mynakara Kiristu kabo iksa my zeka batu kasikpyby. Abaka Kiristu soho motsasokoze batu kapyby. Kapunihikrēta tu Deus wasaniha motsasoko. Iwaze kytsa hi:

— O Sesus Kiristu imysapyrēnikita hỹ — maha. Utakta kaspitu mopykyryk zeka yhỹ my. Kytsa pikbezenaha zeka niwatihi yhỹ my. Kiristu ihyrinymyryta babata harere mozihikik. ²¹ Uta kaspitu zeka Kiristu harere kytsa bo motsasoko. Kytsa Deus pe — O ikia zuba tsamysapyrēta — maha. Mohyrikosokda zeka uta Deus tuk kawahi mynapykyryk.

²² Uta kaspitohitu zeka kahyrikzokzawy humo tybyri zuba mynakara wasani my. Hawa ha ty ja myzihikik batu kanyhy. Uta kaspitu mynapykyryk zeka hawa my. Kytsa pikbezenaha zeka wasani. Hawa ja mozihikik. Paikpa mytsaty mykara. Ske myparawy waha bo ikzumu. ²³ Mohyrikosokda tsihikik. Iwaze Kiristu tuk kawahi mynapykyryk. Iwatahi abaka pikbezenaha zeka wasi. ²⁴ Nawa tatu napykyryk zeka pahatsumuēhī iwaze ahahumo wasani. Iwatahi ahahumo mynapykyryk. ²⁵ Yhỹ ahatuk mynapykyryk iwaze pahatsumuēhī ana humo hi kahyrinymyrēta. Iwaze ikiahatsa Sesus harere bo hỹ tsimykaranaha ihumo ahaspirikporētsa tsimoziknaha iwa pahatsumuēhī. Ahaspirikporētsa tsimoziknaha ana humo hi pahatsumuēhī iwaze ahakurētsa

tsimoziknaha. ²⁶ Iwaze ahabo mynakozoreze ikiahatsa hi:

— O katsaktsa mykurētsa Sesus Kiristu zikwy Pauro mybo ziwatawy iwatsahi mykurētsa hỹ — tsimaha

Deus harere humo ahapunihikrētsaktsa!

²⁷ Kyze Sesus Kiristu harere bo hyỹ tsimaha ahaspirikporētsaktsa! Iharere bo zuba hyỹ tahaktsa kytsa! Kyze ahabo mynakozore zeka, kaku zuba piwabyky. Ahabo zuk byizeka, kytsa ahasoho kabo motsasonaha:

— O Sesus tuktsa Piripos ezektsa wasani mykaranaha. Asaktsa atsa botu mytsaty mykaranaha. Iwaze Sesus harere bo tarabaja ziknakaranaha. Tyharape tsumuēhĩkĩnaha. Sesus harere bo hyỹ mykaranaha iwatsahi ihumo sispirikporētsa Deus wasaniha humo tarabajaziu ziknakaranaha — mykaranaha. Iwa ahasoho ty mopamykysonaha. ²⁸ Ahapyby byihuja. Ahasukyrytsitsa pokso ahapyby byihuja. Ahapunihikrētsaktsa! Ahasukyrytsitsa ahabo iktsa maha zeka asahi sipybyrētsa moziknaha, Deus zikwy ahatuk zeka iktsa mahaze ana humo hi sipybyrētsa. Ahapunihikrētsa tu Deus zikwy mysiwatawyky iwatsahi Deus wasaniha ba zikpykba sihyrinymyrētsa hỹ.

²⁹ Kyze Sesus Kiristu humo ahaspirikporētsa Deus pahahyrinymyryky ikiahatsa iharere bo hyỹ tsimykaranaha abaka itsyhyryze tsitsumuēhĩkĩnaha. Nimywatawyhik ihumo ahaspirikporētsaze iwa itsyhyryze tsitsumuēhĩkĩnaha. Ikiahatsa Kiristu tsyhyryze sinini tsimykaranahaze ana humo kino

niwatihi nimywatawyhik iwa sitsumuēhĩkĩnaha.
³⁰ Katsaktsa mykubyrisorokrētsa! Kytsa
 nimysininiwykynaha atsatu pahasininiwy botu
 iktsaso. Abaka tybyri zuba mykarazo ana hi
 tsipiwabynaha.

2

Kiristu wata tasopykzu.

¹ Abaka Kiristu zuba myzahapehaka iwatsahi
 ahapunihikrētsa tsimoziknaha. Kiristu ahahumo
 tsimypokzitsiarēta iwatsahi ba paikpa mytsaty
 zikaha. Ikiahatsa hi ihumo ahakurētsa. Deus
 hyrikoso ahatuk mynapykyryk. Iwaze tyharape
 pokzitsikinaha zikahabyitsa tu ahamysapyrētsa
 tsimoziknaha. ² Iwatahi ahape my:

— O kytsa batu ahasopyk iwatsahi ba
 zikarapepehanaha! Hawa Sesus mymypokzitsiki
 iwa ikiahatsa kino niwatihi tynaharape
 pokzitsikinaha! Parakbaha atsa botu mytsaty
 tsimykaranaha! Ikiahatsaktsa tsahamykpyriz-
 iurētsaktsa my — iwa tsimykaranaha zeka
 ahahumo kakurēta hỹ.

³ Ahabo ka mytsaty mytsaty byitaha! — Uta
 zuba kahyrinymyrēta — batu tyso. Asahi iwa
 mykaranaha zeka siharererētsa zuba. Ikiahat-
 saktsa tsahaspirikporētsa tsimahaktsa! Kytsa tuk
 ahakubyrisorokoktsa tsimaha. Ikiahatsa ustsas
 soho hi:

— O atakta tsimysapyrēta. Utakta
 batu — tsimaha. Iwa ustsas soho bo
 mytsaty tsimykaranaha. ⁴ Ustsas ahatukytsa
 tysisakihikykynahaktsa. Batu ahasoho bo zuba
 mytsaty zikaha. Ustsas tsysitsumuēhĩnahaktsa.

⁵ Hawa Sesus Kiristu mytsaty ziknakara astsa botu tahaktsa isopyk watu tahaktsa! Hawa Sesus Kiristu nikara isopyk watu kytsa bo ahasopyksapyhu ja tsimykaranaha!

⁶ Atakta Deus wata ziknakara.

Sesus Kiristu Deus wata iwatatu tabo zuba mytsaty ahabyita nikara. Sesus Deus wata hi. — Utakta abazubata — iwa batu mytsaty nikara.

⁷ Atahi tazikwy zerekik. Atahi tsumuēhĩtsa niyzik.

Atahi ihyriziktsokzawy humo ity huak ahabyita wata. Mybarawy ezekta niyzik maku babata.

⁸ Maku niyzikze Deus harere bo zuba hyỹ ziknakara. Kyze Deus nizihikik nahahumo nihyrikosokda iwa sinini nikara.

Kytsa iharapatawyhyta humo zihyrikiknahaze iwatatu Deus harere bo hyỹ ziknakara.

⁹ Iwatahi Deus okzeka Sesus myhyrizikwani niyzik.

Atahi:

— O Sesus imysapyrēnikita. Sesus wasani nikara. Ata zuba myhyrizikwani — niy.

¹⁰ Iwaze Sesus myhyrizikwani bijoikpe ezektsa bo piwatawy, mybarawy ezektsa bo kino niwatihi piwatawy,

siakbatsa sizubarētsa kino niwatihi bo piwatawyky iwa Sesus myhyrizikwani mysiwatawyky.

Iwatsahi tsezubaha iharere bo yhyỹ mykaranaha.

Sesus okeryk tahaekaratsa humo puruk puruk mykaranaha iwaze mypehakatsa mozik ziwatawykynaha.

¹¹ Kytsa sizubarētsa piwabynahaze asa hi:

— O Sesus zuba mypehakatsa. Atazuba mypehakatsa.

Atahi wasani mykara. Atahi imysapyrēnikita — mykaranaha.

Iwa motsasokonahaze Deus myzo bo mopamykysoziukunaha hỹ.

Sesus tuktsa myzubaha bo Deus mysiwatawyky.

¹² Katukytsa wabyziutaha! Ahatuk ziknapykyrykze kaharere bo hyỹ ziknakaranaha hỹ. Abaka nokponi iksapy mynapykyryk atsawatu kaharere bo hyỹ tsimykarannahaktsa puētsik kaharere bo hyỹ tynakaranahaktsa. Hawa Kiristu mozihikik ana kino tsimykarannahaktsa kytsa! Iwa iharere bo ma tsimaha. ¹³ Hawa Kiristu mozihikik ana ty hi tsimykaranaha iwa Deus pahatsumuēhĩkĩ. Iwatahi zikwy ty ahabo nyny my iwatsahi ihumo hawa Kiristu mozihikik atsatu tsimyzihikiknaha. Iwa Deus harere bo zuba yhỹ tsimykaranaha hỹ.

¹⁴ Hawa tsimykaranaha ahaharereharakyhyk byihuja. Ahahyriziktsokzawy tsimykarannahaze ahapepehaka byihuja. ¹⁵ Ahaharereharakyhyk byizeka Deus okzeka batu ahasikpyby. Wasani tsimykaranaha. Ikiahatsa Deus tyryktsa ahamysapyrētsa tsmoziknaha. Mybarawy ezektsa kytsa simyspihikbatarētsa mykaranaha. Asahi simysapybyitsa ziknakaranaha. Asatuk tsinapykyryknaha. Ikiahatsa situkze byrisoiktsa

hyrity watsa tsimaha. Hawa bijoikpe miwa eze byrisoiktsa natahahyritzikubannahaze amypubyri mozik. Iwata ikiahatsa wasani tsimykaranaha Deus harere tisapyrēna mysiwatawyky. ¹⁶ Deus harere mysihyrinymyrykynaha. Deus wasania ty iharere humo simysapyrētsa moziknaha ana humo hi mysiwatawykynaha. Iwa zeka kakurēta. Sesus Kiristu myziksizoze nawa puruze Sesus kytsa soho motsaso:

— O atahi wasani mykara. Usta bo atakta batu. Batu wasani mykara — my. Nawa puruze Sesus myziksizoze ikiahatsa iharere bo hyŷ tsimykaranaha iwaze ahahumo kakurēta. Hawa tsikykaranaha kahyritziksokzaharēta mykara ahatsyhyryze wasani ikykara, kahyritziksokzawy ahatsyhyryze kasokpykziurēta mykara iwa tsahahyrinymyrētsa.

¹⁷ Pikbezenaha zeka ja. Tubabatu kytsa hozipyrykzatsa nisibanahaze Deus bo nyny ziknakaranaha. Pikbezenaha zeka utakta hozipyrykza zikziwezokonaha nawata mozik. Deus bo uta tu piknyny. Ikiahatsa kino niwatihi ahaspirikporētsa babatsa zeka anaty hi Deus bo nyny tsimaha. Hozipyrykza hyrity wata. Ikiahatsa Deus harere bo hyŷ tsimykaranaha iwaze ihumo tsimyspirikpokonahaze ana ty hi Deus bo nyny tsimaha. Kytsa pikbezenaha zeka kakurēta my. Ikiahatsa kino niwatihi katuk ahakurētsa tsimykaranaha iwaze uta kino pahakusukni. ¹⁸ Ahakurētsaktsa! Tsahakurētsa zeka uta kino niwatihi kakurēta my.

Timoteo Epaporodito ahatsa sisoho motsasoko.

¹⁹ Mypehakatsa Sesus yh̄y myzeka Timoteo ahabo myzipeha. Iwa mytsaty mykara. Hawaze ahasoho piwaby zeka kakurēta mozik. Ahasoho piwaby zeka batu paikpa mytsaty mykara. ²⁰ Atakta kawata pahatsumuēhī tsihikik. Katukytsa tuk zeka atahi zuba ahahumo tsimypokzitsiukrēta h̄y. ²¹ Utsa katukytsa taha bo zuba mytsaty mykaranaha. Sesus Kiristu pitsumuēhīnaha zeka batu mytsaty zikaha. Timoteo batu. Atahi Sesus harere bo zuba hȳy mynakara.

²² Hawa nikara ana hi botu tsahahyrinymyrētsa. Isapyhanikia ty zuba ziknakara. Katuk tarabaja ziknakara. Hawa itse tazo tuk tarabajaziu nikara iwata atakta katuk tarabaja nikara. Katsaktsa Deus wasania ty kytsa sizubarētsa bo tsiktsasokonaha iwaze kytsa Sesus harere bo zuba hȳy nikaranaha iwatsahi ihumo sispirikporētsa moziknaha, iwa tarabajaziu tsikykaranaha. ²³ Atakta ahabo myzipeha. Tapara hawa ja my mykara kahyrinymyrēta iwaze uta ahabo myzipeha. ²⁴ Uta kino ahabo mynakozore tsihikik. Mypehakatsa yh̄y my zeka abanurytu ahabo mynakozore. Iwa mytsaty mykara.

²⁵ Kyze mytsy Epaporodito ahabo myzipeha. Atakta katukta my katsa petoktsa tsikyziknaha Deus wasania ty tsiktsasokonaha h̄y. Mykubyrisorokrētsa tsikykaranaha. Atahi ahasapyzeken kabo tsikzipehanaha tahi ziktsumuēhīkī. ²⁶ Atakta ahahumo tsihyrizikbarēta. Tsimyitsapyrēta niyzik anasoho tsiwabynaha. Tisukatsihīkrēta nikara paikpa mytsaty mytsaty nikara.

²⁷ Ata kino tsimyitsapyrēta asiba nira Deus ihumo zipokzitsiki iwaze zizororowy. Mohyrikosokda zeka kasukatsihikrēta mozik. ²⁸ Iwatahi aidy ahabo myzipeha tsihikik. Ibo iktsa tsimahaze ahakurētsa. Ahahumo hi uta niwatihi abaka batu kasukatsihik.

²⁹ Myzumuze ihumo ahakurētsaktsa kytsa! Sesus tuktsa tyharape kusuknikinaha! Kytsa tahawatu simyhyrizikwynikitsa mozikanaha. Hawa Epaporodito nikara. Kytsa isoho — O atahi tsimysapyrēta — maha. Ahasopyksapyhu ja! ³⁰ Atakta Kiristu nizihikik naha humo hi asiba nihyrikosokda. Nimytsumuēhīze Kiristu humo asiba nira. Iwa ahatsyhyryze nikara. Ikiahatsa zikahabara iwatahi ahasapyzeky niyzik.

3

Hawa Deus okzeka wasani my.

¹ O katukytsa nepykykze ahape my:

— Mypehakatsa Sesus humo ahakurētsaktsa! tsimaha — my, ana hi mozihihikik. Kyze kapehawy botu iktsaso ahabo iwatahakazo. Kapehawy humo pahatsumuēhī iwatahi batu kasikpyby, kapehawy humo ahabo piwatahazo:

² — O kytsa pykyhytutaha! Kytsa simysapybyikitsa humo pahaspihikbata tsihikiknaha. Sakmyitsa simysapybyitsa mykaranaha. Utsa kytsa nisipiakzyzykyknaha iwaze Deus okzeka simysapyrētsa mytsaty ahabyitsa mykaranaha. —

³ Katsaktsa Deus tyryktsa babatsa tsimaha. Tubabatu Moises harere hi:

— O kytsa tsikapiakzyzyknahaktsa iwaze iwatahata niyzik Deus tyryktsa kytsa bo tsiwatawynaha

— niy. Ana kino mytsaty mykaranaha. Katsaktsa batu. Abaka katsaktsa ustsā kytsa bo mysipokz-itsikinaha iwaze katsaktsa Deus tyryktsa tsipiwatawykynaha. Deus hyrikoso mymytsumuēhī iwatsahi Deus bo tsimysakibazikiknaha:

— O Deus myzo ikia zuba wasani tsimy kara. Ikie zuba tsamysapyrēta. Ikie humo ka mykurētsa hỹ — tsimy karanaha. Deus hyrikoso humo, katsaktsa mykurētsa, Sesus Kiristu sopykwy humo tsimy karanaha. Iwaze kytsa sinury humo nisipiakzyzykyknahaze ana humo hi batu sispirikpo. Sisopykwy humo batu sispirikpo. Sesus sopyk ty zuba tsimy karanahaze katsa Deus tyryktsa tsi-moziknaha ana hi tsiwatawynaha.

⁴ Katsaktsa Deus okzeka mymysapyrētsa tsi-moziknaha. Taparaktsa sopykwy ty zuba batu hỹ tsimy karanaha, sihumo batu mospirikpo. Kytsa Deus okzeka simysapyrētsa mypehakatsa harere bo hỹ mykaranaha iwa zeka utakta motsasotohi. Aty zipiakzykik zeka wasani mytsaty my zeka utakta wasani tohi mytsaty mykara.

⁵ Utakta kapurukwy zumuze, estuba tsyhyryze ipykze kytsa zikpiakzyzykiknaha. Utakta Isareu ezekta my. Kazotsa Sudeutsa niaha. Utakta Bēsami tukytsa. Kazotsa Ebereutsa niaha iwa taypyk. Utakta Pariseutsa Moises harere bo yhỹ ziknakara. ⁶ Hawa wasani my ana hi mozihikik. Sesus tuktsa iksisukyryikik ana kino wasani mytsaty ahabyita ikykara. Moises harere bo yhỹ ikykara. Batu aty tohi kasoho ziktsaso:

— Atakta Moises harere bo batu hỹ nikara — niaha. Moises harere humo yhỹ ikykara iwaze Deus

okzeka kamysapyrēta mozik mytsaty ahabyita ikykara.

⁷ Abaka batu. Mektatu Sesus harere bo zuba yh̄y mynakara. Hawa wasani mykara mytsaty ahabyita ikykara abaka batu mysapy kahyrinymyrēta my. Iwatahi kazotsa sopykwy iksimoewybaik. Tapara taparaktsa sopykwy humo kakparawy. Abaka mahani, sisopykwy humo batu kakparawy.

⁸ Sisopyk tsizubarēna botu imoewybaik. Abaka isapyrēnikia zuba mozihikik. Kiristu zuba mozihikik ana kino tisapyrēna atahi kapehakatsa mozik, iharere bo zuba hȳy mykara ana hi mozihikik iwa Sesus tuk mozuruku. Hawa ikykara naha ykpyri wa. Kytsa ykpyri pipaparanaha atsawatu ustsā sopykwy humo imoewybaik. Iwatahi Kiristu tukta babata mozihikik. ⁹ Sesus tuk mynapykyryk. Utakta Sesus tuk atsatu mytsaty tsimykaranaha. Atahi amy ty tisapyrēna ty kabo nyny niy. Tisapyrēna ty kabo nyny niyze batu Moises harere ibyky humo yh̄y iky. Tisapyrēna ty kabo nyny niyze, Sesus harere bo hȳy mykara iwatahi ihumo kaspirikporēta ikyzik. Iwa. Kiristu inahyryzikpo utakta niwatihi abaka ituk mynapykyryk.

¹⁰ Iwaze Kiristu harere bo hȳy mykara ihumo mospirikpoziu zeka ituk mozuruku. Iwa Kiristu tuk mozuruku. Hawa Kiristu sinini nikara utakta niwatihi iharere bo hȳy mykara zeka moziksukyrykynaha. Iwa Kiristu wata mozik. Kiristu myhumo tsimypokzitsiarēta iwatahi kytsa mysapyzekenaha. Katsa iwa tsimoziknaha batu mybo zuba mytsaty tsimykaranaha.

11 Iwatahi Deus mozikyrizikpowy ana hi taperyky, iwaze ituk kawahi mynapykyryk.

Katsa Deus ske buruk tsimykurunahaze kytsa motururukuknahaze tapara zumuta wata tsimaha.

¹² O kytsa batu tyso:

— O uta botu kamysapyrēta ikyzik tsizubarēna inymyrybaik. Sesus harere bo hỹ mykara iwatahi kaspirikporēta ikyzik iwatahi batu kahyrinymyry tsihik — my. Iwa batu tyso. Utakta tarabajaziu mykara iwaze Deus okzeka kamysapyrēta mozik iwatahi kapaikrēta tarabajaziu mykara. Batu kakubyri zikzumu. Ana humo hi Kiristu zikwatawyhik. Itukta ziknyhik, iwatahi kaspirikporēta babata mozik ana humo hi mynakara h̃, tybyri zuba mykara. ¹³ O katukytsa batu mytsaty mykara:

— O utakta botu ikspirikpo baba — my. Iwa batu kapetu kasopyk. Hawa isapyrēnikia batu epyk. Nawaha ty ikykara naha ikspiriktsokda. Abaka hawa isapyhanikia ty ana ty zuba mykara. Kaspirikporēta ikyzik ana hi mozihihik. ¹⁴ Kytsa motururukuknahaze. Ata para pomota itypyhanikita my. Ata hi batu tasukpe bo iktsa ziky. Batu paikpa iktsa ziky. Utakta iwata my. Deus Sesus Kiristu humo zikwatawyhik, ituk kawahi mynapykyryk, meky watu mozik ana hi piperyky h̃.

¹⁵ Iwatsahi katsaktsa Sesus Kiristu harere bo hỹ tsimykaranaha ihumo myspirikporētsa h̃ iwatsahi mytsaty tahaktsa! Aty mektatu mytsaty my zeka Deus anahumo pahahyrinymyry. Nawaha ty wasani my Deus hi pahahyrinymyry.

16 Hawa Kiristu sopyk humo yhỹ tsikykaranaha atsatu iharere bo hyỹ tahaktsa kytsa!

17 — O katukytsa! Hawa ahatuk zikzurukuze kasopyk watujataha tsimykaranaha. Utsa kytsa asaktsa kawatsa mozurukunaha sibo iktsaziu tsimykaranaha. Hawa mykaranahaze ahasopykzukuktsa tsimykaranaha! — my

18 Hawa ha ahabo motsasoko botu iktsaso. Tsizubarēna iktsasoko abaka ahabo motsasoko. Kytsa sizubarētsa hawa mozurukunaha Kiristu sukyrytsitsa moziknaha, iwatahi kasukatsihikrēta. Hawa mozurukunahaze Kiristu sisapyzeken harapatawyhyta humo nihyrikosokdaze nispirtsokdanaha. 19 Asaktsa Deus sinini ykarawy bo mysipehahik. Deus harere bo batu hỹ zikaha, hawa myzehikiknaha ana humo kino mytsaty mynakaranaha. Sisikpybybyikitsa:

— O kytsa mysopyk bo iktsa tahaktsa — maha. Sisikpybybyitsa tu taha bo zuba sisopyk iwatsahi astsatu mykaranaha.

20 Katsaktsa batu tsimaha. Mekywatu tsimoziknaha. Sesus Kiristu humo myspirikporētsa iwaze bijoikpe mysapy baba my. Myhudikhudikwy tsimyzurukunahaze mysapy baba eze taperykynaha. Sesus Kiristu Deus bo mymyoktyhyrykta taperyky. Atahi bijoikpe ikny myziksizo. Mynasikzoze mybarawy bozo atahi taperyky. 21 Myziksizoze mynury ezytyk ty mybo nyny my. Abaka mynury humo mykubyrizumu. Mymyitsapyrētsa tsikyzyknaha. Mynury mohyrikosokda. Iwaze Sesus mekta tu mynury ty mybo nyny my. Tsimyharabokzonaha.

Mynury ezytyk mozikzo Sesus nury wata maha. Inury tisapyrēta hỹ. Sesus Kiristu tsipunihikrēta. Hawa tohi zikaha ba. Izikwy humo mynury huak ty iwaze izikwy humo mekta tu nury ty ezytyk mybo nyny my hỹ, ezytyk zuba mynury mozik. Hawa tohi zikykbannahabyitsa.

4

Mypehawy ahabo my.

¹ O katukytsa ahahumo kamypokzitsiukrēta. Ahahumo kahyrizikbarēta. Tsipikykusuknikinaha. Ahahumo kakurēta ahasoho kytsa bo mot-sasoko. Uta hi:

— O Piripos ezektsa humo kakurēta. Sesus tuktsa humo kakurēta hỹ — mykara. Iwa ziknakara. — O kytsa hawa Sesus sopyk tsimykaranaha ana humo kino ahakubyrisorokrētsaktsa tsimaha — my.

² Kyze utakta:

— O wytykyryk Eudia, Sītike ahaza wabytok-totahatsa! Tyharape pokzitsinahaktsa! Iki-haka ahatukytsa Sesus Kiristu humo ahaspirikporēza iwazahi Sesus harere bo yhỹ tahaktsa! — mykara. ³ — Iki Sizikus katukta mynasitsumuēhĩ. Wytykyryk petoku asizahi myharape betsakaknahaze tysitsumuēhĩkta — my.

Tubatu asizahi katuk tarabajaziu nikaranaha. Deus wasani haty sizubarētsa bo nitsasokonaha. Keremente kino niwatihi ustsya mytuktsa Deus wasania ty kytsa sizubarētsa bo nitsasokonaha. Katsumuēhĩtsitsa Deus tsyhyryze tarabaja nikaranaha sinaro botu ziwatahaba. Bijoikpe eze

Deus nisiny papeu humo sinaro ziwatahabaik,
Sesus humo meky watu niyziknaha.

Ikiahatsa mytsaty mytsa byitaha Deus bo tsimypamykysokonaha.

⁴ — O katukytsa Sesus tuk tsinapykyryknahaze ahaku tsiwabykynaha! Ahape myzo. Ahaku tsiwabykyzonaha! — my. ⁵ Sizubarētsa tysipokzitsinaha ahakubyrisoroku ja. Sesus atsoko myziksizo ana bo hi mytsaty tahaktsa. ⁶ Batu paikpa mytsaty tsimykaranaha. Batu ahape tu ahasopyk:

— O Deus myzo kahumo pipokzitsi ja. Batu kanyhy — tsimaha. Iwa batu tyso. Ikiahatsa hi Deus bo tsimypamykysokonaha, amy humo ahakubyri ibo tsimyzapykykynaha. Ikiahatsa hi:

— O Deus myzo amy humo pikykubyri eze ka abo myzapykyky. Hawa ha myzehikik zeka kabo nyny tsimy iwatahi kakurēta mykara — tsimaha. ⁷ Iwa zeka mytsaty mytsaty byitaha, Deus pahapunihikwyky myzubaha ana humo kino batu sihyrinomyry ziwabykynaha zuba. Sesus tuk tsinapykyryknaha zeka mekywatsa tu tsimoziknaha. Ahamysapyrētsa tsimoziknaha. Hawa tsimykaranaha zeka mytsaty mytsaty byitaha tsimaha, Deus hi ahapokzitsikitsa my ana humo hi ahahyrinomyrētsa. Iwatsahi ihumo ahakurētsa.

⁸ Pykyhytutahaktsa! Hawa mytsaty tsimykaranaha ana humo hi pykyhytutaha. Amy wasani zuba mytsatyziutaha! Kytsa pipokzitsikinahaze ana humo hi mytsatyziutaha! Isapyrēnikia bo mytsatyziutaha! Iwa mytsatyziutaha. Wasaniha bo wabyziutaha ana humo hi kytsa sakurētsa moziknaha ana

bo hi mytsatyziutaha. Deus okzeka, kytsa okze kino niwatihi wasani my. Sizubarētsa bo wasani my. Iwa ana bo kino mytsatyziutahaktsa. Iwa tsiziurēna. Batu tymyi. Tisapyrēna iwa ana bo kino mytsatyziu tahaktsa! Tsizubarēna humo kino ahasikpyby byihuja ana bo hi mytsatyziutahaktsa kytsa! ⁹ Kaharere bo yh̄y tynakaranahaktsa! Nawa ha ty ahahyrinomyryky naha ty tynakaranahaktsa! Hawa mozuruku ikiahatsa tihiktsa! Kaharere tsizubarēna bo hȳy tahaktsa! Iwaze Sesus mymykusukniki ahapaok baze tu mynapykyryk.

Pauro Piripos ezektsa humo tsakurēta.

¹⁰ Abaka tsiktsumuēh̄izonaha. Tapara tsiktsumuēh̄ik̄inaha. Iwaze tsepyknaha. Tsihokdahrēna tu tsepyknaha. Ikiahatsa kahumo tsahamypokzitsirētsa ana humo kino kahyrinomyrēta. Abazuba kahumo ahamypokzitsiukrētsa tsiyawawyzonaha. Utakta Sesus tuk mynakara kakurēta, ikiahatsa tsipiktsumuēh̄inahaze niwatihi kakurēta mykara.

¹¹ Batu kasopyk:

— O kanamy nepykta tu batu kasopyk. Kanamybyita tu wasani my. Kanamyrēta mykara zikino wasani my, iwaha tu yh̄y — mykara.

¹² Utakta kanamy tsikaeni iwaha humo tu kakurēta. Kanamy tsizubarēna ana humo kino kakurēta. Hawa mozuruku wasani my. Hawa mykara iky niwatihi kabo wasani mykara. Kasorokrēta zeka wasani my. Karaparēta kino niwatihi wasani mykara. Kanamyrēta zeka wasani mykara, kanamybyita zikino niwatihi

wasani mykara. ¹³ Hawa kahumo mykara ana humo hi kapunihikrēta mozik. Iwaze Sesus humo kaspirikporēta ikyzik. Kiristu humo hi pikpunihikwyky iwatahi kakurēta mozik. Izikwy humo ba hawa tohi zikaha. Iwatahi kapunihikrēta mozik.

¹⁴ Iwaze tsiktsumuēhīnahaze wasani tsimykarana. Kytsa zikyknikiknahaze batu katy arek iwaze tsikpokzitsikinaha. ¹⁵ Ikiahatsa Piripos ezektsa zuba tsiktsumuēhīnaha. Masedonia ikny iknaparakze ikiahatsa zuba tsiktsumuēhīkīnaha. Anaeze tuze Deus wasania ty ykbata zuba ikyze iktsasoko kyze kino tsiktsumuēhīkīnaha. Ikiahatsa zuba okyrysaro ty kabo nyny tsikaha.

¹⁶ Utakta Tesaronika eze tuze kanamy nepyk hana bo ja. Anaeze ahanamy kabo tsibiakakana. Tsizubarēna okyrysaro ty kabo nyny tsikaha. ¹⁷ Ahanamy humo ka batu kamyzehik. Deus isapyrēnikia ty ahabo nyny my anahi mozi-hikik. ¹⁸ Nawa ha ty ikiahatsa kabo nyny tsikaha Epaporodito zebykyryk. Tsizubarēna ty kabo nyny tsikaha. Abaka piwatahaka utakta ahanamy humo kakurēta iwaze kakurēta hỹ. Iwatahi batu kakubyri. Isapyrēnikia ty topyririk koro tosikwaka. Deus ana okmorē pioksaze ana humo hi tsakurēta. Pahapokzitsiki hỹ. Ahanamy usts Sesus tuktsa bo nyny tsimykarana zeka atahi tsakurēta hỹ. Hawa tsikykarana topyririk koro tosikwaka. ¹⁹ Amy humo ahakubyri zeka anatyhi Deus ahabo nyny my. Ikiahatsa Sesus tuk tsimykarana. Atahi tsinamyreta hiba iwatahi amy humo ahaku byri zeka ahabo nyny my atahi

imysakihikyrēnikita my. ²⁰ Iwatahi Deus koikny baktatu ipe my:

— O Deus myzo ikia zuba tsahyrizikporēta. Ikia zuba amysapyrēnikita tsimy — my. Iwa hỹ.

Abaka asiba nepyk kytsa bo mytsaty mykara.

²¹ Kyze Sesus tuktsa sizubarētsa ahahumo sihyrizikbarētsa. Katukytsa katuk ahahumo sihyrizikbarētsa. ²² Sesus tuktsa katuktsa ahahumo sihyrizikbarētsa. Asaktsa sipehakatsa myhyrizikwanikita humo tarabajaziu mykaranaha asahi ahahumo sihyrizikbarētsa mykaranaha.

Deus pahasapywyky.

²³ Iwaze utakta ahatsyhyryze Deus bo mopamykysoko:

— O Deus myzo Sesus tuktsa Piripos ezektsa tysisakihikykta! Mypehakatsa Sesus Kiristu tysipokzitsikikta! — mykara. Niwazuba. De.

Pauro

Deus Harere Aibaky Sesus mymyspirikpoko naha

New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

2f0260ea-5969-5180-9ac5-183d63a989f1